



DEO OPTIMO MAX.
UNI ET TRINO,

VIRGINI DEL-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS,
manè discutienda, die Jovis vigesimâ-secundâ mensis Octobris,
anno Domini M. DCC. LXI.

M. PETRO-ANTONIO LEPY, Doctore Medico,
Præsîde.

An bis in die cibari præstet quàm semel?

I.

VIX à sanitate descisceret homo, si semper sui mentisque
compos, parenti Naturæ docilis viveret & obsequiosus;
sed eheu! Imbecillum deludit voluptas, ut jam sensuum
servus magis quàm moderator, brevi à rectâ vivendi ratione
decedat, nec nisi pravorum vitæ mores, pessimasque consuetudines
amplectatur. Talem propè dixerim quæ ævo nostro, & plus sanè

2

nimio invaluit, stomachum unâ & solutâ refectione saturare ut ad postridie & sæpius ad nausæam usque fastidiat; quæ quam inordinata sit & vitæ incolumitati adversa, non tantummodo ratione, sed etiam universâ naturæ institutione monstratur.

I I.

INTER tenacissimos ejus consuetudinis sectatores permultos videris imò plerosque omnes qui mensâ plurimum delectari, lautis longisque epulationibus voluptantur, & tunc primum fami satisfecisse putant cum Omasum eò repleverint, ut cibo cuicumque vel etiam levissimo repugnet. Adeone mirum est, si ita saturati pastu unico ad diem contentos se jactitent? Longè temperantiùs agere videntur greges, armenta & cætera cujusque generis animantia, quæ cum nihil ultra naturam moliantur, nusquam etiam ultra satietatem depascunt, novâ semper appetentiâ gaudent; pabulo frequenter indulgent, vix tamen unquam tardâ aut imperfectâ ingestorum coctione molestantur. Quin etiam nec diverso sed simili propè more foelices vivunt Ruricolæ, Operarii, qui diuturno labore exercitati, revigente semper appetitu, tam crebro quam simplici victu reficiuntur, nec magis de singulo sumunt quam expetit naturæ modus & necessitas: vivunt tamen, imò quod summa voluptas est, vegetiores ad laborem, vitam & sanitatem evadunt. Adeò indubitatum est nullum extrâ naturam rectum consistere, ipsamque unam esse veræ rationis documentum; nam.

Nunquam aliud natura, aliud sapientia dicit.

Juv. Sat. XIV.

I I I.

HALLUCINANTUR ergò qui stomachum assiduo usû defatigari prætexentes, suum ipsi interdum permitti otium, adeoque pastum unum ad diem sufficere volunt, ne constanti exercitatione fatiscat. Minus enim franguntur vires quæ perpetuum in usum quam quæ præter modum impenduntur, ut docet Mechanices, probante perenni cordis & arteriarum pulsu; quin imò vel ipsa experientiâ constat fortius robur ab unâ & assiduâ agendi consuetudine comparari, cum quotidie videamus inter cursores, bajulos, rotatores & diversos diversi modi operarios, eas magis vigescere corporis partes quæ minus impenso sed frequentiori

labore exercentur. Eâdem lege ³ vivit ventriculus, qui glandulæ simul & muscoli vices gerens, nunquam adeò viget quàm cum lentâ & molli sed non intermissâ vasorum fibrarumque actione operatur.

I V.

GASTRUM contrâ ægrefcere viderimus cum rarâ epulatione refectus, totum unâ vice absomit quod duabus reciperet: tum enim ultrâ vires repletus eò usquequâque distenditur, ut divariata ipsius fibræ, brevi nativum elaterem perdant, perduto elatere flaccescant, & sic tandem terendis subigendisque alimentis ineptæ fiant & impares; adde quod parca menstrui quantitas nimîâ ingestorum farragine diffusa, vel solidis itâ absorbetur, vel liquidis itâ diluitur, ut non modò nulli dissolvendo sufficiat, sed etiam à suâ indole desciscat & sæpissimè morbosam putidamque naturam induat. Undè ructus, nidores, nausæ, vomitus, prava stomachi dispositio, ciborum corruptio, alvi fluxus, morborum omne genus; quod apud eos videre est qui gastrimargiæ dediti, saginamque pro vitâ & arte habentes, ventriculum non modò explendo, sed onerando itâ fatigant, ut debitâ coctione adeòque validâ nutritione fraudati, obesi, tardi, somnolenti, vitam brevem & vix non totam in infirmitate consumant.

Omne nocet nimium, modicis est longius ævum:

Summa cadunt, durant sed moderata diu.

V.

SUNT autem nonnulli ita parùm edaces, ut ipsis ad diem una tantum aut altera alimenti libra sufficiat, an etiam istis dividatur pastus? Bipartitus sanè meliùs decoquetur, habilior resurget gaster, revigebit appetitus, & sensim sine sensu vices suas resumet natura; sunt alii qui totâ die negotiis impediti, non nisi semel & vesperscente die, cibari possunt aut volunt; sunt tandem alii quibus cœnæ, alii quibus prandium magis arridet, quorumque permulti à viginti aut circiter annis cœnare, vel prandere tantummodò suescunt; an etiam ipsis mutetur vitæ ratio? Absit. Periculosum enim sæpè ab assuetis desuescere, sed meliùs nullam nisi naturâ duce amplecti consuetudinem, meliùs frequenter cibo indulgere, quippè eo pacto semper moderatè premens esurienti.

4
nunquam ad immoderatam ingluviem pellit, adeoque sæpius & modicum appetens ventriculus, tutius satiatur quin nimio ingurgitetur venter, facilius fit coctio, nutritio perfectior, omnes denique liberiùs absolvuntur functiones ad vitæ & sanitatis emolumentum.

Ergò bis in die cibari præstat quàm semel.

Proponebat Parisiis SIMON VACHER, Bisuntinus, in Universitate Bisuntinâ Doctor Medicus, Saluberrimæ Facultatis Parisiensis Baccalaureus, necnon exercitus Regii in Insulâ Corsicâ nuper Medicus, Theseos Auctor. A. R. S. H. 1761. A SEXTA AD MERIDIEM.